

Pretendì unitad dals chatschaders

Ils represchentants dals chatschaders grischuns èn sa radunads la sonda passada a Cazas

■ (anr/ac) Robert Brunold da Sursaisa presidescha per ulteriurs trais onns l'Uniun grischuna dals chatschaders da patenta. La radunanza da delegads da la sonda passada a Cazas ha elegì cun Arnold Giger e Tarzisius Caviezel dus novs suprastants. Engaschi da chatschadras e chatschaders han plirs pledaders pretendì la sonda passada a Cazas a favur da la reputaziun da la chatscha entaifer la societad. Tranter quels il commember da la suprastanza da l'Uniun svizra da chatscha, Tarzisius Caviezel. El ha pretendì dals chatschaders ina offensiva comunicativa e da betg tgirar la cultura da discutir sulet tranter chatschaders. I saja impurtant da parter ils aspects positivs da la chatscha cun l'ulteriura populaziun. Caviezel nun è stà il sulet pledader a la radunanza da delegads da l'Uniun grischuna dals chatschaders da patenta la sonda passada a Cazas che ha tematisà la reputaziun publica da la chatscha. Il motiv èn las stentas politicas che sa drizzan pli e pli cunter la chatscha. En il Grischun èn actualmain duas iniziatives pendentas avant dretgira, ina pertutga la chatscha speziala e l'autra cun la pretensiun per ina chatscha etica e cumportabla cun la natira. E Caviezel ha fatg attent a las activitads politicas en il chantun Turgov. Actualmain saja là ina gruppa-ziun londervi da rimnar sutscriptziuns per ina iniziativa cun la finimira da sur-schar la chatscha sulet a la surveglianza da chatscha. Caviezel è persuadì che l'unitad tranter ils chatschaders saja actualmain da gronda impurtanza. Il suprastant Flurin Filli ha formulà la sonda passada il bainvegni a delegadas e delegads per rumantsch. El ha accentuà ch'il sa deputar dal singul chatschader saja la finfinala decisiv per mantegnair la credibilitad da la



Èn elegids da nov en la suprastanza da l'Uniun dal chatschaders da patenta dal chantun Grischun: Arnold Giger e Tarzisius Caviezel (da san.).

FOTO W. CANDREIA

chatscha en la populaziun. Disputas internas ed in sa cuntegnair senza il repect vicendaivel na saja betg d'avantatg per la chatscha grischuna. Engaschi politic da chatschaders spetga er il cusseglier guvernativ Mario Cavigelli. E quai en eventuals cumbats politics che sa drizzian cunter la chatscha grischuna.

Robert Brunold resta president

Preschents a la radunanza da delegads da la sonda passada èn stads ils represchen-

tants da 72 secziuns da chatscha, en tut 187 vuschs. E quellas vuschs han unanimamain e cun applaus elegì Robert Brunold per ina ulteriura perioda al timun da l'Uniun grischuna dals chatschaders da patenta. Da nov èn vegnids elegids en la suprastanza Arnold Giger da la secziun Greina e Tarzisius Caviezel da la secziun da chatscha da Tavau. Ils ulteriurs commembers da la suprastanza èn vegnids reelegids. Dà suatientscha ha la radunanza a trais diversas propostas per adattar

l'ordinaziun grischuna da chatscha. Ina è vegnida da la suprastanza sezza che ha preschentà a la radunanza duas propostas per la durada da la chatscha 2018. La radunanza è sa decidida per la varianta che lubescha la chatscha durant quatter fins d'emna en il mais settember. Per uschia augmentar la pussaivladad dad ir a chatscha e cuntanscher il dumber giavischà da predas. Vinavant ha la radunanza sustegnì la proposta da lubir la chatscha speziala als chatschaders ch'èn en possess

da la patenta da sajettar capricorns e da lubir als chatschaders dad entrar en l'intschess da chatscha gia a las 12.00 enstagl pir a las 16.00 sco enfin qua. Quai il di avant il cumenzament da la chatscha ed il di da la Rogaziun federala. Las propostas sa drizzan al chantun cun il giavisch dad adattar l'ordinaziun da chatscha. Il cusseglier guvernativ Mario Cavigelli ha explitgà che la cumissiun da chatscha dal chantun vegnia a discutir las propostas ed el vesia bunas schanzas da pudair resguardar ils giavischs da l'uniun dals chatschaders.

Dapli cumpetenzas als chantuns

Il cusseglier dals chantuns Stefan Engler ha fatg attent a las tractativas politicas en il parlament federal che pertutgian la chatscha. Ina impurtanta fatschenta daventa la revisiun da la lescha da chatscha federala. Engler spetga ussa sin il sboz da la confederaziun elavurà per la consultaziun. La protecziun dal luf vegn ad esser la dumonda cardinala da questa lescha ed Engler pretenda dapli cumpetenzas per ils chantuns da pudair intervegnir svelt per eliminar lufs ed urs che chaschunan problems. Il cusseglier dals chantuns grischun vul en general sa defender envers las stentas da centralisar e da reglar adina dapli sin palancà federal. El favurisescha soluziuns chantunalas pli datier a la realitad. Sia davosa preschentaziun uffiziala avant la radunanza da l'Uniun grischuna dals chatschaders ha absolvì il timun da l'Uffizi chantunal da chatscha e pestga, Georg Brosi. El terminescha ses engaschi professional la fin da l'onn ed è sa regurdà avant ils delegads da radunanzas passadas in bun tant pli tensivas.